

zuzendariari

(0034) 943 300 222



zuzendariari@egunkaria.com



Martin Ugalde kultur parkea 20140 Andoain

Irunen

Zuhaitz Olazabal Susperregi (Irungo Goldea prekarietatearen aurkako taldeko kidea)

Nahiz eta guztiok izan lan duin bat edukitzeko eskubidea, egun badakigu hori ez dela egia. Enpresaburuek, beren irabaziak beti handitu nahian, prekarietatea eta lan baldintza kaskarrak dira langile gazteoi eskaini diguten errealitatea, eta prekarietate egoera hori onartu edo langabezia da egun gazteok dugun aukera bakarra. Egundirua edonor edo edozeren gainetik dagoen honetan, gazte askok prekarietate egoera hori onartu besterik ez daukagu sistema honetan bizirik irauteko.

Eta hori da Irungo Luxpack enpresan

gertatzen dena. 78 langile ditu enpresa horrek, gehienak emakumeak dira, eta dituzten lan baldintzak oso txarrak dira. Egundirua 9 ordu lan egitera behartuta daude eta 480 euro (80.000 pezeta) soilik irabazten dituzte, inongo lan hitzarmenik aplikatu gabe (Arte grafikoetakoa da aplikatu behar lieketen lan hitzarmena) eta ez daukate harreman sindikal bat izateko eskubiderik.

Prekarietate egoera argia izan arren, bertako langileek ez dute beren egoera aldatzeko inongo urratsik egin. Zergatik ote? Lan baldintza horietan lan egiteko prest dagoen pertsonak benetan du diruaren beharra eta, behar horrek bultzatuta, egoera txar eta prekario horietan lan egin nahiago dute ezer ez eduki baino.

Hori da egun barnerarazi diguten filosofia, eta hori praktikara eramaten duten enpresaburuak dira. Beren irabaziak jartzen dituzte langileon eskubideen gainetik eta berdina zaie langileek 9 ordu lan egin, harreman sindikalik ez eduki eta 480 euro besterik irabazten badute ere beren irabaziak handitzen diren bitartean.

Dena den, argi eta garbi utzi nahi dugu adibidetzat hartu dugun Luxpack enpresan gertatzen dena ez dela kasu bakarra; zoritxarrez, egundirua milaka euskal langilek jasaten duten errealitate gordina da. Eta guztion artean egoera bidegabe eta lazarri hau aldatzeko garaia da, izugarriko dirutza eskuratzen baitute langileoi eskubide bat urratuz, gure etorkizuna antolatze beharrezko baldintza den

lan duin bat edukitzeko eskubidea ukatuz.

Euskara eta espainolismoa bateragarriak?

Juan Miguel Zabala Zubieta • BILBO

Itxaro Bordaren aburuz, «Iparraldean euskararen bidez sartzen ari den espainolismo bat» omen dago. Hegoaldean behintzat, azkeneko mendean gaztelania eta euskararen ukazioa izan dira espainolismoa sartzeko bide naturala. Uste nuen Iparraldean ere frantsesak eta euskararen ukazioak zer esan handia zutela frantseste prozesuan. Harrigarri egiten zait euskara eta espainolismoa uztartzeko aipamen soila.

montxo



galdeiozu... ?



ABRAHAM OLANO

Txirrindulari ohia

Indurain, Pantani, Armstrong txirrindulari ikusgarriak izan dira, eta mendian maila bikaina eman dute. Igotzen eduki duzun mugak garaipen zerrenda mugatu dizu?

Iñaki Zabala (Zarautz)

Mugatu du, noski, baina badira beste txirrindulari batzuk mendian oso ongi ibiltzen direnak eta gero ordekan hain maila onean ibiltzen ez direnak. Ni ahalik eta maila onena ematen ahalegindu naiz aldapa gora, baina nire fisionomia ezin zen gehiago aldatu; nahikoa aldatu nintzen afizionatuetatik profesionaletara pasatu nintzenean. Beste fisionomia bat eduki izan banu, aukera gehiago izango nuen, bai.

Urtarrilaren 14tik aurrera **Txus Jaio • Auto gidaria** izango da Galdeiozu ataleko gonbidatua. Bidali zure galderak ordurako. galdeiozu@egunkaria.com

hirusta



Fredi Paia

Autogestioaren kultura

Jugoslaviar estatuak gizartea antolatze saio berezi bat egin zuen XX. mendearen erdialdean. Kapitalismoaren eta komunismoaren akatsei irtenbide bat eman nahian eratu zuten antolaketa eredu horri autogestioa deitu zioten. Lan egiteko filosofia zahar baten formulazio berria izan zen. Norbere baliabideen bitartez norberaren beharrezane erantzuteko irrintzi bakartia. Ez zuen aurrera egin eta gaur egun mamia hustu dioten aldarrikapena baino ez da jende askoren ahotan.

Nora iritsi gura duan? Noan harira.

Bihar jarriko da martxan *txapel bete bertso* ekimena. Bizkaiko bertsolari gazteek beren kantuak zabaltzeko pairatzen duten plaza urritasunari eurek eta euren baliabideen bitartez emandako erantzuna. Bat-batean abesteko gai eta jendaurrera ateratzeko grinatsu dabilen bertsolarien eurentzako sortutako plaza zirkuitu bat da. Ka-

rrantziatik barduliarren lurralderaino tabernaz taberna hilabetero izango da biharko bertsolaritzaren mezulariei entzuteko parada.

Inor garrasika agertu zen behin, bertsolariok gure jardunean jokatzeko dugun paper pasiboaren salatari. Deia jaso, joan, abestu eta ospa egiten genuela zioen hari gonbita egiten diogu ekimen honi begira diezaion. Antolatzaileak baitira bertsolari eta bertsolariak antolatzaile.

Kontu filosofikoak alde batera utzita, uste dut badela garaia errealitate sozial, ekonomiko zein kulturulak bigarren planora kondentatzen duen oro bere alternatibaren bila has dadin bere baliabideak erabilita. Bizkaiko bertsolari gazteen moduan. Elkarrekin lan eginda, eta ez elkarren aurka lehiatuz, errazagoa izango delakoan guztiontzako hobe den egoera batera hurbiltzea.

Beraz, badakizue, *txapel bete bertso* ekimeneko saioetan ikusi gura zaituztegu.